

LISTOVI...

GRAČANIČKI GLASNIK
časopis za kulturnu historiju

Broj 51
Godina XXVI
Maj, 2021.
[str. 189-198]

© Monos 2021

LISTOVI...

Listovi gračaničkog kalendara od 22. 11. 2020. do 9. 5. 2021.

Prof. dr. Omer Hamzić

16. 12. 2020.

Gračanilja Fuad Purač iz daleke Australije – nova donacija gračaničkoj bolnici

U ovoj rubrici prošlog broja našeg časopisa zabilježili smo da je početkom jula prošle godine ovaj Gračanilja, koji već 50 godina živi u Australiji, donirao 5 dijaliznih aparata za bolnicu u svom rodnom gradu i tako pomogao da se riješi problem opremljenosti i rada dijaliznog centra. Nakon nekoliko mjeseci uslijedila je nova donacija, opet gračaničkoj bolnici. Ovoga puta njegova bratična Elvedina Omerović predala je zposlenicima Bolnice jedan mobilni transportni inkubator za bebe i aparat za skrining sluha u ukupnoj vrijednosti od 60.000 KM:

15. 12. 2020.

Gračanica – raste broj novozaraženih korona virusom

Iz stručnih krugova nagovještava se novi talas pandemije. Broj zarženi iz dana u dan se opet povećava. Na području Gračanice registrovano je 5 novih pozitivnih slučajeva, trenutno je aktivno pozitivnih 86, a u izolaciji 313 osoba (podaci iz Doma zdravlja Grčanica). Zaključno sa prethodnim danom na području Tuzlanskog kantona registrovano je 57 novih pozitivnih slučajeva nakon što je testirano 186 uzoraka. Preminulo je 8 osoba, najstarija (1928), a najmlađa (1966) godište. Trenutno je u TK aktivno pozitivno 1690 osoba, od čega je 173 hospitalizirano u UKC-u Tuzla. Na respiratore je priključeno 15 osoba. U kućnoj izolaciji je 1517 osoba, dok je pod zdravstvenim nadzorom njih 2451.

4. 12. 2020.

Epidemiološke mjere: otkazane sve decembarske zabave i manifestacije

Zbog iznimno teške epidemiološke situacije i novih mjera kriznih štabova civilne zaštite, (ograničeno okupljanje, policijski čas i dr.) ove godine se otkazuje projekat Klizališta, kao i druge

prateće aktivnosti kao što je “Zima u Gračanici”, “Zimski bazar” i dr. U sadašnjoj situaciji najvažnije je sačuvati zdravlje i sigurnost građana, saopšteno je iz Gradske uprave.

23. 12. 2020.

Prva on-line promocija “Gračaničkog glasnika” (49. i 50. broj)



Zbog epidemiološke situacije, ambiciozno zamišljen, program obilježavanja vrijednog jubileja ovog časopisa – 25. godina neprekidnog izlaženja i izdanja njegovog 50 broja, nije mogao biti realizovan. Zato je nedavno organizovana prva on-line promocija 49. i 50. jubilarnog broja. Čitaoci su mogli promociju pratiti uživo putem facebook stranice Narodne biblioteke “Dr. Mustafa Kamarić” u Gračanici, koja je i bila organizator događaja. Moderatorica je bila voditeljica Biblioteke Senada Letić. Iako u otežanim uslovi, potrudili smo se da ni 49. a pogotovo 50. jubilarni broj, po kvalitetu tekstova, likovnoj opremi i uopće po raznovrsnosti tema nimalo ne zaostaju za prethodnim, rekao je na promociji član Redakcije Edin Šaković, predstavljajući sadržaj oba broja. Od svih sadržaja posebno je istakao objavljen drugi dio Žrtvoslova poginulih Gračanlija u Drugom svjetskom ratu. Kraći osvrt na proteklih 25 godina izlaženja i 50 brojeva “Gračaničkog glasnika” telegramski je prezentirao osnivač Časopisa i glavni i odgovorni urednik prof. dr. Omer Hamzić. Donosimo glavne akcente iz tog izlaganja: **Statistički:** Počeli smo odmah iza rata, početkom 1996. godine, u vrlo teškim uslovima, sa dva broja godišnje i tako u neprekinitom kontinuitetu punih 25 godina. To je danas

bogata i obimna kulturno-historijska hronika Gračanice i njene šire okoline, koju je ispisivalo 375 saradnika, od početnika u nauci i umjetnosti, pa do akademika. To je oko 10.000 stranica, na kojima je objavljeno preko 1000 radova (bibliografskih jedinica) različitog žanra, dostupnih u printanom i elektronskom izdanju čitaocima širom svijeta (internet adresa: www.gracanickiglasnik.ba). Samo bibliografija Časopisa ispisana je na 85 stranica normalnog formata. Ovaj časopis je indeksiran u međunarodnoj bibliografskoj bazi CEOOL i referentan je na mnogim našim fakultetima društvenog usmjerenja. O kompetenciji, te visokim stručnim i profesionalnim dometima Časopisa, te o kvalitetu objavljenog štiva, svoju ocjenu dale su kompetentne institucije i pojedinci. Žanrovski i **tematski spektar** ovog časopisa je širok: od članaka čisto naučnog karaktera do publicističkog i novinarskog zapisa, od historiografije do kulture i tradicije, kulture sjećanja – od književnosti do umjetnosti i slikarstva. Obradene su mnoge teme iz lokalne historije, od novo-otkrivenih stećaka i srednjovjekovnog grada Sokola kod Gračanice, do najvažnijih događaja iz posljednjih ratova i stradanja ovog naroda. Obradene su političke i gospodarske prilike u pojedinim periodima, nastanak mnogih starih građevina, naselja, mahala, opisani značajni ljudi i događaji. Na stranicama Časopisa otvorene su i neke još uvijek kontroverzne teme bliske prošlosti, poput Blajburga, sudbine bosanskih muslimana u Drugom svjetskom ratu, o smislu takozvane lokalne historije itd. **Specifičnosti:** Ovaj časopis je specifičan po tome što je zadržao određena lokalna obilježja i “šmek Gračanice” (naziv, teme itd.), ali se načinom obrade i pristupom takozvanim malim lokalnim temama historije, tradicije i kulture nametnuo kao “studija slučaja”, koja se može odnositi na čitavu Bosnu i Hercegovinu. To je glavni kriterij kojeg se Uredništvo Časopisa dosljedno pridržava pri izboru tema i radova, naravno, uz ostale visoke standarde savremene perio-

dike (rigorozne redakteure i recenzije radova, dizajn, kvalitet štampe itd). Malo je gradova i čaršija u Bosni i Hercegovini koje imaju takav "mega zapis" iz svoje kulturne historije, tradicije, kulture sjećanja.... Šteta, velika. Jer, svaka čaršija u Bosni i Hercegovini, zaslužuje da ima svoju "svoj" Gračanički glasnik", poručio je glavni i odgovorni urednik i osnivač, prof. dr. Omer Hamzić.

28. 12. 2020.

Održana prva (konstituirajuća) sjednica Gradskog vijeća Gračanica

Nakon proceduralnih i drugih uobičajenih postupaka (polaganje zakletve, izbor Komisije za izbor...itd), za predsjedavajućeg Gradskog vijeća izabran je Nihad Krajinović (SDP), koji je i do sada profesionalno obavljao tu funkciju. Za zamjenika predsjedavajućeg izabran je Edin Šehić (Platforma) za progres. Glasalo se javno, kako je predložio Klub vijećnika SDP. Gradonačelnik Nusret Helić čestitao je izabranim i poželio uspješan rad novom Gradskom vijeću. Da podsjetimo, prema rezultatima posljednjih lokalnih izbora, stranačka struktura ovog saziva vijeća je sljedeća: SDP ima 12 vijećnika, SDA ima 8, Stranka za BiH 3, Naša stranka 2, Demokratska fronta 2, Platforma za progres 2, te Savez za bolju budućnost jednog vijećnika.

30. 12. 2020.

Otvoren Turistički ured u Gračanici

Prethodno je osnovana Turistička zajednica Grada Gračanica kao neprofitna organizacija, čiji bi zadatak trebalo da bude da promovira turizam i turističke potencijale ove lokalne zajednice. Turistički ured otvoren je u prostoru i ambijentu Osman-kapetanove medrese U Gračanici. Podršku su u svojim govorima dali gradonačelnik Nusret Helić i pomoćnik ministra za trgovinu i turizam u Vladi TK Dželmına Huremović. Za voditelja Turističkog ureda postavljen je Edin Ibrišević...

7. 1. 2021.

Održana 2. sjednica Gradskog vijeća Gračanica: Budžet za 2021. godinu...

...planiran je u iznosu je u iznosu od 16.922.575 KM i u odnosu na Nacrt veći je za 1.607.705 KM. Veći su prihodi za 813.086 KM i procijenjen je višak prihoda iz ranijeg perioda za 794.619 KM. "Iako se očekuje da 2021.godina bude jedna od najtežih i godina stabilizacije, naš Budžet je i razvojni jer je za kapitalne izdatke planirano 6.265.513 KM, više od 37 % ukupnog Budžeta", rekao je u svom obrazloženju gradonačelnik Nusret Helić. "Osim Sportske dvorane u koju ulažemo preko 2.200.000 KM i koja je najveća investicija, ulažemo još u vodosnabdijevanje cca 1 milion, putnu infrastrukturu cca 1,2 miliona, te ostale projekte (Regulacija Sokoluše, kanalizacija, klizišta, dječija igrališta i drugo)." Prijedlog Budžeta Grada Gračanica je u konačnici usvojen sa 20 glasova "za" i 8 "protiv". Uz Budžet, usvojena je i odluka o njegovom izvršenju, a nakon toga i odluka o izmjenama Poslovnika Gradskog vijeća Gračanica. Odluka o statusu Predsjedavajućeg, koji će i u ovom nadatu biti profesionalno angažovan usvojena je sa 20 glasova "za", 7 "protiv" i 2 "suzdržan".

13. 1. 2021.

Spomen-obilježje na mezaru komandanta 212. brigade Bahrije Džananovića

Podignut je na inicijativu boraca, veterana 212./222. Bosanske oslobodilačke brigade, u mezarju Šabuša u Gračanici i otkriven upravo na godišnjicu njegove smrti. Otkrivanju spomenika prisustvovali su najbliži članovi porodice, predstavnici boračkih udruženja, njegovi saborci, kao i predstavnici grada Gračanica i općina Lukavac i Doboj Istok.

29. 1. 2021.**Proглаšeni najbolji sportisti i sportski radnici grada Gračanice u 2020. godini**

Ovogodišnja manifestacija, za razliku od dosadašnjih, iz poznatih epidemioloških razloga bila je dosta skromnija i po sadržaju i po broju posjetilaca. Ipak, organizacioni odbor je uspio provesti sve predviđene procedure predlaganja, te stvoriti uslove da sama manifestacija medijski bude kao i do sada dobro praćena. Program je počeo sa *posthumnim priznanjima*, koja su dodijeljena: za doprinos razvoju rukometa profesorici tjelesnog odgoja Hadžiji Grbić i Hajrudinu Heliću i za doprinos u razvoju nogometa Muhamedu Šeli i Izetu Gopi. *Posebna priznanja* za razvoj sporta u Gradu općenito dodijeljena su Tomislavu Tomanu, a za razvoj nogometa Zaimu Nurkiću, Azuru Altumbabiću i Husejinu Mehanoviću, za razvoj rukometa Mirsada Gopi, te za razvoj ženske odbojke Ibrahimu Žuniću. Nakon posebnih, dodijeljena su tradicionalna priznanja po granama sporta i sportskim selekcijama. Za *najuspješniju pionirku* proglašena je Amina Husejnović (Karate klub Gračanica), a za *najuspješnijeg pionira* Edvin Šišić (Košarkaški klub Gračanica); *najuspješnija kadetkinja* je Esma Mekić (Džudo kluba Pribava), a *najuspješniji kadet* Muhamed Šišić (Šahovski klub Gračanica); *najuspješnija juniorka* je Ajna Nurić (Ženski odbojkaški klub Gračanica), a *najuspješniji junior* Kenan Havić (Nogometni klub "Bratstvo"); *najuspješniji trener* je Ferid Imamović (Nogometni klub "Bratstvo"), *najuspješniji sportski radnik* je Zaim Spahić; *najuspješniji ženski sportski kolektiv* je Ženski odbojkaški klub Gračanica, a *najuspješniji muški kolektiv* Rukometni klub Gračanica; za *najuspješniju sportistkinju godine* proglašena je Lejla Kovačević (Ženski odbojkaški klub Gračanica), a za *najuspješnijeg sportistu godine* Omer Mehmedović (Rukometni klub Gračanica).

4. 2. 2021.**O Kompaniji "Tehna" iz Gračanice: skoro tri decenije uspješnog rada.**

Osnivač firme, rahm. Hajrudin Šišić, počeo je prije 27 godina sa nekoliko građevinskih radnika i u vrlo teškim, ratnim uslovima. Rasla je i razvijala se u Donjoj Lohinji kod Gračanice, pored puta Doboj Tuzla. Danas je to jedna od vodećih kompanija u oblasti izrade i montaže armiranobetonskih konstrukcija. "Tehna" se bavi masovnom proizvodnjom betonske galanterije i raznim proizvodima iz elektro programa, a posjeduje i pogon za proizvodnju betonskih blokova za zidanje, te vlastitu tehnologiju proizvodnje temeljnih stopa, stubova, međuspratnih i krovniha greda, sekundarnih krovniha nosača i nosača koji čine sastavni dio mostovskih konstrukcija. Iza sebe ima izgrađene objekte poput "Mercatora" u Tuzli, "Interexa" u Sarajevu, zatim "Slavije" u Banjoj Luci, "Berlijete" u Visokom, objekat "Edoslad" u Gračanici, "Malcom" u Sarajevu, te objekte "Niskogradnja" u Laktašima, "Robot" u Sarajevu, "Eurogalant" u Gračanici i dr. "Sve godine iza nas bile su pune izazova, a ova posebno (...) Godina iza nas je bila jedna od boljih od osnivanja naše kompanije. Svi projekti, koji su dogovoreni u 2020. godinu uspješno su realizovani, sa malim pomjeranjima rokova (...) Ciljevi u ovoj 2021. godini su da investiramo u proizvodne pogone, kako bismo mogli širiti naše kapacitet, te nastavili ispunjavati očekivanja naših klijenata, kojih je sve veći broj, kao i zadovoljstvo radnika, koji su naš motor i veliki pokretač", izjavila je za Poslovne novine Selma Jukan, direktorica finansija u "Tehni". (izvor: "Poslovne novine")

12. 2. 2021.**Umro pukovnik Rasim Sakić, istaknuti oficir Armije RBiH iz Gračanice**

Rođen je 1939. godine u Gračanici, gdje je završio osnovnu. Srednju vojnu školu završio je u Sarajevu, a vojnu akademiju, KoV i Komandno-štabnu akademiju u Beogradu.



Bivšu JNA napustio je 27. 2. 1992. u činu potpukovnika. Bio je član Patriotske lige od 27. 2. 1992. godine (izvor: Rasim Dupljak, *Oni su branili Bosnu i Hercegovinu*. Sarajevo: Zajednička komanda Vojske Federacije BiH, 2004., 459.). U želji da se uključi u pripreme za odbranu svoje domovine, prvenstveno svoje rodne Gračanice, negdje u martu 1992. godine ostvario je kontakte sa Općinskim sekretarijatom za narodnu odbranu u Gračanici. Oko 20. aprila (prema navedenom izvoru, 8. aprila) javio se u Opštinski štab TO i stavio na raspolaganje kao dobrovoljac. Odmah je postavljen za koordinatora za odbrambene pripreme u Štabu, a kasnije za koordinatora između Opštinskog štaba TO Gračanica i Okružnog štaba TO Tuzla, odnosno komande Operativne grupe 2 (Gračanica) i komande Drugog korpusa Armije RBiH u Tuzli, dao je veliki doprinos stabilizaciji stanja i organizaciji prvih jedinica i komandi Opštinskog i rejonskih štabova TO, a kasnije i komande OG-2 Gračanica, te u formiranju brigada i bataljona u njenom sastavu. Svojom upornošću, stručnošću, a nadasve smirenošću i realnim procjenama situacije, pa i u najtežim momentima, pozitivno je djelovao na stabilnost komandi, ali i civilnih vlasti, posebno u prvim danima rata, kroz organizaciju inženjerijskog uređenja grada i položaja jedinica u zoni odgovornosti Opštinskog štaba i OK 2. Često se služio lukavstvom (i raznim trikovima) tokom izvođenja akcija u cilju zavaravanja neprijatelja, kažu dosta uspješno. Bio je izuzetno omiljen

i cijenjen u Gračanici i u narodu i među borcima. U novembru 1994. godine postavljen je za komandanta Nastavnog centra Drugog korpusa A BiH za obuku regruta u Tuzli. Na toj dužnosti je ostao do kraja 1996. godine, kada je ponovo penzionisan. Ostatak života proveo je kao ratni vojni umirovljenik u Tuzli. Smrt ga je zadesila u 83. godini života. Ukopan je 14. 2. 2021. na mezarju Režići u svojoj rodnoj Gračanici.

17. 2. 2021.

Održana 3. sjednica Općinskog vije Gračanica: imenovano sedam komisija, usvojen izvještaj o radu i program rada Vijeća...

.... te još nekoliko materijala koji se tiču lokalne uprave: Izvještaj o rješavanju upravnih stvari u upravnom postupku u službama za Upravu Grada Gračanica u 2020. godini, Informacija o realizaciji vijećničkih inicijativa i pitanja u 2020. godini. Usvojen aje i Informacija o stanju zaštite građana od neeksplozivnih i minskoeksplozivnih ubojnih sredstava na području grada Gračanica.

1. 3. 2021.

Dan nezavisnosti Bosne i Hercegovine u Gračanici

I ovo obilježavanje bilo je primjereno "pandemijskoj" situaciji. U Sali za sjednice Gradske uprave održana je prigodna akademija sa referatom koji je pročitao predsjedavajući Vijeća Nihad Krajinović. Posebnu pažnju pobudio je dokumentarni film pod naslovom "Gračaničko referendumska DA" autora Fahrudina Kurtovića. Po završetku svečane akademije položeno je cvijeće na gradska spomen obilježja.

3. 3. 2021.

Umro Midhat Čehajić, direktor gračaničke kompanije "Fining"

Rođen je 1951. godine u Gračanici, gdje je završio osnovnu školu i gimnaziju, potom Mašinski fakultet u Sarajevu. Skoro čitav

radni vijek proveo je u gračaničkom “Feringu”, radeći u vodećoj grupi inženjera, koji su u predratnim godinama uspjeli tu firmu razviti u jednu od najperspektivnijih izvoznica u Bosni i Hercegovini u sferi metalne industrije sa blizu 450 radnika, većinom stručnih i visokokvalifikovanih. Tokom rata vodio je izvoznu filijalu “Feringa” u Splitu. Poslije rata nastavio je sa radom u “Feringu” koji je kao uspješna firma preživio rat, ali je kao i mnoga druga preduzeća “potonuo” u valovima poslijeratne privatizacije. Midhat Čehajić se zato kao i mnogi dugi 2003. godine “otisnuo” u vode privatnog biznisa. Počeo je sasvim skromno, sa svega 2 radnika kao privredno društvo za prodaju rabljene opreme za građevinarstvo, posebno kranskih dizalica njemačkih proizvođača. Za narednih petnaestak godina razvio je firmu sa 60 radnika mašinske i elektro struke, od kojih veći broj visokokvalifikovanih majstora i inženjera, koji su ovladali proizvodnjom mosnih i portalnih dizalica, njihovom rekonstrukcijom i modernizacijom. U 2018.. godini *proizvedeno je i kupcima isporučeno 98 mosnih i portalnih dizalica i povećan ukupan promet sa 5,2 na 6,2 miliona u 2019. godini*. Midhat je imao jasnu viziju budućeg razvoja svoje firme, čvrst e kontakte sa uglednim partnerima u Njemačkoj. Iznenađna smrt ga je u tome presjekla. Krasila ga je ljudska dobrota i druželjubivost, u mladosti se bavio atletikom. Imao je istančan osjećaj za potrebe i lične i porodične probleme svojih radnika, koji su ga ne samo poštovali, već i voljeli kao svog najboljeg druga. Iza njega ostala je supruga, kćerka i sin, te unučad i druga mnogobrojna rodbina. Ukopan je 5. 3. 2021. godine u mjesnom Greblju Režići.

11. 3. 2021.

Počela vakcinacija zdravstvenih radnika u Gračanici

U gračanički Dom zdravlja stiglo je prvih 30 doza vakcina protiv Kovid-19 AstraZeneka. Kako je Radio Gračanica doznala od

epidemiologa Dr. Muhidina Mujića, vakcinu je primilo 10 uposlenika Doma zdravlja Gračanica, dok će se narednog dana vakcinisati još njih 20. Direktor Opće bolnice Gračanica, doktor Jusuf Hodžić javio je da će vakcinacija početi i u toj ovoj zdravstvenoj ustanovi. Sa današnjim danom u Gračanici je evidentirano 9 novozaraženih korona virusom, aktivno pozitivnih je 28, a u izolaciji 89 osoba. U Tuzlanskom kantonu evidentirane su 94 novozaražene osobe korona virusom, a testirano je 398 uzoraka.

19. 3. 2021.

Zbog pogoršanja epidemiološke situacije, policijski sat u TK: od 21.00-05.00

Na prijedlog Kriznog štaba Ministarstva zdravlja TK, Vlada TK je donijela zaključak kojim se zabranjuje kretanje stanovništva na području Tuzlanskog kantona u periodu od 21.00 sat do 05.00 sati narednog dana, počev od 20. do 29. marta ove godine, sa izuzecima za one koji su radno angažovani u tom vremenskom periodu. Uz ograničenje kretanja zabranjuju se posjete domovima za stara i iznemogla lica na području Tuzlanskog kantona do daljnjeg.

31. 3. 2021.

Potpisan sporazuma o formiranju većine u Gradskom vijeću Gračanica...

...po kome će, nakon uobičajenih lokalnih političkih natezanja i zatezanja, Socijaldemokratska partija, Stranka za BiH, Platforma za progres, Demokratska fronta, Savez za bolju budućnost i nezavisni vijećnik Dino Deđić. “Komotnu” većinu činit će ukupno 20 vijećnika, dok će kao opozicija djelovati SDA i Naša stranka sa 8 vijećnika. Za razliku od Sarajeva, ovdje su SDP i Naša stranka na suprotnim pozicijama što je i bilo za očekivati.

31. 3. 2021.**Održana 4. sjednica Gradskog vijeća
Gračanica: Izvještaj o izvršenju
Budžeta za 2020.**

Izvještavajući o prošlogodišnjem Budžetu, gradonačelnik Helić je rekao i ovo: *“I pored svih teškoća kroz koje smo prolazili prošlu godinu (drastičnog pada prihoda, pogotovu po osnovu PDV-a) i grantova, uspjeli smo budžetsku godinu završiti uspješno, bez obzira što smo od nekih projekata i stavki morali privremeno odustati. Neki su već realizovani ili se realizuju. Pored svih problema uzrokovanih manjkom prihoda zbog pandemije i drugih razloga, a prihodi su manji za više od 4 miliona KM, uspjeli smo naš budžet održati stabilnim i budžetsku 2020. godinu završiti sa suficitom. To nam stvara mogućnost da u 2021. planiramo još neke projekte i namjene kroz rebalans budžeta, ali i da lakše prebrodimo eventualne poremećaje planiranih prihoda u budžetu ove godine.”* Izvještaj o izvršenju Budžeta je usvojen sa 21 glasom ZA i 8 Protiv. Sa istim brojem glasova je usvojen i Izvještaj o korištenju budžetske rezerve za 2020. godinu. Prijedlog Odluke o usvajanju i provođenju izmjena i dopuna Regulacionog plana “Centar” Gračanica izazvao je najviše polemike i nesuglasja na ovoj sjednici, pa su vijećnici SDA, prilikom izjašnjavanja o ovoj tački, kao “opozicionalci” nezadovoljni napustili sjednicu. Prijedlog Odluke o usvajanju i provođenju izmjena i dopuna Regulacionog plana “Centar” sa dva amandmana Gradonačelnika je usvojen sa 18 glasova ZA i 2 suzdržana. Osim izmjena urbanističkog plana “Centar,” puno neslaganja između “pozicije” i “opozicije” u Vijeću, kao i obično, bilo je oko važnijih kadrovskih pitanja. Prilikom izjašnjavanja za Rješenje o razrješenju predsjednice i članova Gradske izborne komisije, vijećnici SDA su opet demonstrativno napustili sjednicu Planovi upisa učenika u I razred Gimnazije i MSŠ Gračanica kao i još nekoliko drugih tačaka usvojeni jednoglasno.

Usvojeno je i nekoliko izvještaja: o realizaciji Programa rada, ostvarivanju politike grada i aktivnostima Gradonačelnika za 2020. godinu, o izvršenim procjenama prometa nepokretnosti i prava za 2020. godinu, o odabiru projekata po javnom pozivu za omladinske i nevladine organizacije, o anketiranju građana o zadovoljstvu radom Uprave i radom Gradskog vijeća, a k znanju su primljene informacije o dodijeli stipendija učenicima srednjih škola i studentima za šk. 2020/2021. godinu i o stanju zaštite od požara i vatrogastva, praćenja i izvršenja plana zaštite od požara na području grada Gračanica u 2020. godini.

5. 4. 2021.**Ubrzano širenje korona virusa i na području grada Gračanica**

Tim povodom Kolegij Gradonačelnika Grada Gračanica održao je sjednicu sa koje je pozvao građanstvo na obavezno pridržavanje propisanih naredbi i preporuka kriznih štabova ministarstava zdravstva Federacije BiH i Tuzlanskog kantona. Po podacima Zavoda za javno zdravstvo Federacije BiH i Tuzlanskog kantona, kako je saopšteno, na području grada Gračanica za period od 2. 4. do 4. 4. 2021. godine novoprijavljena su 43 lica pozitivna na COVID-19. “Ovim putem ponovo pozivamo građane da izbjegavaju privatna i javna okupljanja i ograniče svoja kretanja na najmanju moguću mjeru i da se striktno pridržavaju propisanih mjera lične zaštite (...) Širenje zaraze može dovesti do velikog broja smrtnih slučajeva, zatvaranja firmi i ugrožavanje životne egzistencije- mislite na zdravlje i egzistenciju sebe i drugih. Kršenje navedenih naredbi predstavlja kršenje Zakona o zaštiti stanovništva od zaraznih bolesti u Federaciji BiH, Krivičnog zakona Federacije BiH i drugih zakona,” konstatovano je u ovom saopštenju.

7. 4. 2021.**Skromno obilježen 7. april, Dan oslobođenja Gračanice u Drugom svjetskom ratu.**

S obzirom na epidemiološku situaciju, Dan oslobođenja Gračanice u Drugom svjetskom ratu, 7. april, obilježen samo skromnim okupljanjem delegacija lokalne uprave i boračkih organizacija ispred spomen obilježja u gradu. Odata je pošta poginulim i položeno cvijeće na Spomen kosturnicu poginulim borcima NOR-a, bistu Josipa Broza Tita i Centralno spomen obilježje. Cjelodnevni program Radio Gračanice bio je posvećen ovom važnom datumu.

7. 4. 2021.**Umro Kasim Kusturica, zv. Kamo – dugogodišnji kino-operater i rukovodilac Kina u Gračanici**

Još kao učenik, na zanatu, 1952. godine, zainimao se za kino, da bi poslije obuke u Beogradu dobio stalni posao kinoaparatera u gračaničkom kinu, gdje upravnik bio njegov stariji brat Bajro, takođe kinooperater. Kino je u to vrijeme imalo status samostalne ustanove. Filmovi su se prikazivali u staroj zgradi kod sahat kule, jedno vrijeme i poslije izgradnje Doma kulture. Nakon Bajrinog odlaska u Zagreb, 1962., gdje takođe nastavlja posao u kinodistribuciji, Kasim Kusturica je postavljen za upravnika kina. Naredne godine Kino ulazi u sastav Narodnog univerziteta i nastavlja sa radom u statusu se radne jedinice. Kasim Kusturica ostaje rukovodilac te radne jedinice, odnosno upravnik Kina sve do odlaska u mirovinu, godinu dvije prije posljednjeg rata. U međuvremenu, od 1969. godine, nakon osnivanja Radio Gračanice, koja je takođe radila u okviru Narodnog univerziteta, povremeno je, u honorarnom statusu obavljao i poslove tehničara na toj radio stanici. Bio je zaljubljenik filma, vrlo vrijedan i pedantan u poslu, lijepih manira i naravi. Zahvaljujući njegovom angažovanju, kao i umješnosti i vezama njegovog brata

Bajre, Gračanica je godinama dobijala najbolje svjetske i domaće filmove, mnogo prije od većih gradskih centara i po tome bila poznata. Kasim Kusturica je ukopan 8. 4. 2021. u mjesnom greblju Režići.

12. 4. 2021.**Raste broj zaraženih i u Gračanici**

U zadnja dva dana u Gračanici su potvrđene 32 novozaražene osobe korona virusom. Aktivno pozitivnih je 106, a u izolaciji 271 osoba, saopšteno je iz Doma zdravlja u Gračanici, a prenio Radio Gračanica. Sve veći broj je umrlih.

19. 4. 2021.**Učenici ponovno u školskim klupama**

To je Odluka Vlade TK, koja je na svojoj vanrednoj sjednici, održanoj 15. 4. 2021. podržala Naredbu Kriznog štaba Ministarstva zdravstva Tuzlanskog kantona, kao i sve naredbe i preporuke Kriznog štaba Federalnog ministarstva zdravstva, koje ostaju na snazi do daljnjeg. Od Ministarstva obrazovanja i nauke je zatraženo da nastavu na univerzitetima, visokoškolskim ustanovama, u srednjim školama i osnovnim školama (redovne i paralelne osnovne i srednje škole) organiziraju na način kako je bila realizirana u periodu prije uvođenja online nastave. Do daljnjeg ostaju na snazi i naredbe i preporuke, koje se odnose na ugostiteljske objekte i javni prijevoz, obustava posjeta domovima za stara i iznemogla lica na području Tuzlanskog kantona, obustavu izvođenja praktične nastave za sve učenike i studente koji tu nastavu obavljaju u javnim i privatnim zdravstvenim ustanovama na području Tuzlanskog kantona osim za studente XII semestra Medicinskog fakulteta (klinički staž). Dozvoljava se izvođenje hladnog operativnog programa u općoj anesteziji u svim javnim i privatnim zdravstvenim ustanovama bolničkog nivoa na području Tuzlanskog kantona do nivoa od 30% redovnog operativnog programa.

30. 4. 2021.**Održana 5. sjednica Gradskog vijeća Gračanica: odluka o imenovanju vijeća mjesnih zajednica...**

...izazvala je najviše pažnje na ovoj sjednici. Ipak, nakon iscrpne rasprave odlučeno je da se većina odluka o uspostavi vijeća mjesnih zajednica vrati predlagачima na doradu. Samo četiri mjesne ispoštovale su postavljene kriterije i mogu nastaviti proceduru uspostave novih vijeća: Gračanica, Gornja Lohinja, Lendići i Miričina. Dosta rasprave bilo je i o nacrtu odluke o dodjeli ovogodišnjih priznanja Grada Gračanica kao i o redovnim godišnjim izvještajima nekoliko javnih preduzeća i ustanova: Centar za socijalni rad, Bosanski kulturni centar, Dječje obdanište, Veterinarska stanica, Gradska apoteka i Dom zdravlja. Usvojena je i Odluka o uslovima i postupku za ostvarenje prava na obavezno zdravstveno osiguranje lica u statusu socijalne potrebe na području grada Gračanica i Informacija o higijensko epidemiološkoj situaciji na području grada gračanica

2. 5. 2021.**Umro Javier Suman, istaknuti gračanički privrednik, dugogodišnji direktor "Feringa"**

Zadnji period svoga života proveo je kao penzioner u Zagrebu, gdje je i umro u 91. godini života. Jedan je od trojice braće Sumana (Rizo, Javier, Nesib), koji su obilježili privredni i društveni život Gračanice u posljednje tri-četiri decenije prošlog stoljeća. Svoj radni vijek počeo je u nekadašnjem Zagnatskom preduzeću "Metalcu" iz kojeg će se razviti preduzeće "Partizan", kasnije "Fering", kojeg je i utemeljio kao modernu firmu i bio na njenom čelu nekoliko godina. Njemu zahvaljujući, "Fering" je svojevremeno dospio u krug vodećih proizvođača građevinskih kranskih dizalica na prostoru bivše države. Nakon rata, osnovao je privatnu kompaniju "Suman", koja godinama uspješno posluje u Gračanici. Ukopan je 5. 5. 2021. godine u mjesnom mezarju Drafnići.

7. 5. 2021.**Semir Osmanhodžić: Izložba slika starih gračaničkih džamija**

Atelje akademskog slikara Semira Osmanhodžića i BKC Gračanica pod pokroviteljstvom medžlisa IZ Gračanica, organizovali su pred Osman-kapetanovom medresom izložbu slika starih gračaničkih džamija sa drvenom munarom, pod nazivom "Oživljeno sjećanje". Prema starim fotografijama i dostupnim historijskim izvorima Osmanhodžić je uradio i izložio 12 slika (u olovci) tih starih džamija, od kojih je 11 zasigurno postojalo do prve polovine 20. stoljeća. Pored glavne, Čaršijske – Ahmed-pašine ili Bijeje, to su: Čiriš, Mejdan Džedid ili Šarena, Hadži Džafer ili Lipanjska, zatim Potok Džamija, Paša-zade, Olivija i Hidajet džamija, te Pervane, Gojsalić i Drapnić džamija. Kako je u katalogu izložbe napisao Edin Šaković, "u povijesnim vrelima se spominju i još neke: Derviš-hodžina i Memi-hodžina, kojima ni za trag ne znamo, dok usmena narodna predaja veli da je jedna džamija bila u mezarju Džamište, iznad Potok mahale, kao i u Hadžaševom greblju na današnjem Hajdarovcu (gdje je nedavno sagrađena nova džamija)." Ovom izložbom na najbolji način obilježen je Dan džamija u Gračanici.

9. 5. 2021.**Gračanica: Obilježen Dan pobjede nad fašizmom, Dan Evrope i Dan Zlatnih ljiljana...**

Tim povodom je, u organizaciji Gradske uprave Gračanica i Koordinacije boračkih udruženja upriličeno polaganje cvijeća na spomen obilježjima u gradu: Centralnom spomen-obilježju Odborbeno-oslobodilačkog rata 1992. - 1995., Spomen Kosturnici borcima NOR-a i bisti Josipa Broza Tita. Nakon polaganja cvijeća, simbolično je otvorena kancelarija Udruženja "Zlatnih ljiljana" Grada Gračanica. Položeno je cvijeće i na mezarja umrlim zlatnim ljiljanima u nekoliko drugih mjesnih zajednica.



Senad Mešić, dipl.ing.poljoprivrede - 51 god.